



“Hey...ta Pasco! Edicion Special”

Un joya di produccion cu Edjean a lanza riba Mercado!!



STA. CRUZ--E hoben cantante cu tur aña t'ey pa deleita su pueblo cu su cancionnan di fin di aña a regala Aruba e aña aki atrobe un joya musical. For di siman pasa e produccion aki a cuminsa zona na tur radio rond Aruba.

Un produccion cu e biaha aki ta un compilacion di tur su exitonan di fin di aña incluyendo su prome cancion di Pasco cu el'a graba na aña 1994! Nos por a scucha 19 tema resona na radio, entre otro e exitonan “Ta Navidad”, e “Bus di Alegria”, cancion

cu el'a conkista curazon di grandi y chikito cune aña pasa, tambe nos por a scucha un remix di e tema “Yen di Energia”, pero e biaha aki den estilo reggaeton! Sin laga afor e tremendo cancion promocional, “Paranda le la la”, cu ta duna bo gana di biaha di lanta baila y move riba su ritmo hopi pegahoso! Magnifico composicion por cierto di e maestro Chucho Hoek.

Tambe e Dande cu ta cera e produccion, tradicion cu nunca por falta riba Edjean su produccionnan. Un otro sorpresa cu a wordo

anuncia, y cu a laga tur hende masha ansioso y contento ta cuna December, pa ser exacto diarazon dia 6, e hoben aki tin un concierto di Pasco planea pa su fanaticonan y Aruba completo!

Un concierto, cu mescos cu su produccionnan, lo conta cu participacion di musiconan profesional, segun nos a comprende, un señor orkestra, bao direccion di ‘el principe, Hildward Croes’, un elenco di cantante masha popular y stima na Aruba y un variacion completo di musica pa tur gusto. Pues sigur e concierto aki ta priminti di bira algo grandi cu abo no por perde! Nos sa cu tur e proyectonan aki ta tuma nan tempo pa planea y produci, pero tambe e costo nan tras ta uno considerable, mirando e calidad di tur faceta cu esakinan ta exige y ta wordo elabora cune. Pesey mes Edjean kier a manda un danki special na tur su sponsornan cu ta Ling & Sons NV,

Trendy Home builder & Contractor, chuculatitan Verkade y Island Finance, companianan cu sigur ta kere den nos yiunan di tera y cu semper ta apoya te unda cu nan por. Aruba, e produccion ta disponibel pa bo por disfruta di dje, ban demonstra cu nos ta aprecia nos yiunan di tera y inclui e produccion aki den bo coleccion. Nos di “Solo di Pueblo” sigur ta recomenda bo pa busk’e.



Nos kier a manda palabranan di hopi pabien y exito na nos amigo Edjean cu su produccion nobo. Nos ta

sigur cu e temporada aki lo ta sublime un biaha mas. Sigui asina Edjean!